

Quel da la cassacca verda

DA MARIA CADRUVI

■ **L'unda verda n'ha betg bittà a la riva quel da la cassacca verda. Atgnamain donn e putgà! Perquai che tenor numerusas istorgias è el in cumpogn che sa procurar per bainstanza senza cunfins.**

Cler, ina giada ch'ins ha fatg persenn tgi ch'el è chaschuna el er irritaziun. Ma per finir animescha el nus dad avair ideas. I dat bleras ditgas sur dad el che prendan ina buna fin – per nus e betg per el.

In giuven pur aveva erta da ses bab in bain puril en in stadi desolat ed uschiglio nagut auter che debits. El avess gugent maridà la bella figlia da ses vischin. Ma il bab da la giuvna desiderada n'ha betg dà la sumbriva d'ina schanza al giuvenot. Ina notg ha il pauper pur prendì plaz sut il vegl ruver dasper sia chasa e qua è arrivà quel da la cassacca verda. «Sch'i va per daners vi jau gugent ta gidar. Nus fashain in patg: Ti m'empermettas ti'olma cura che ti es mort ed jau ta dun in stgazi. Chava damaun a bun'ura ina rusna sut il suvi nair.» Il giuvenot è stà d'accord – però cun la cundiziun che quel da la cas-

sacca verda survegnia si'olma pir cura ch'il ruver haja pers tut sia feglia. L'auter di ha el chavà sut il suvi nair en flur ed ha chattà ina cuppa plain marenghins. Avant che la stad è stada passada era ses bain puril sanà ed el il consort da la bella figlia dal vischin. Igl è vegnì atun e quel da la cassacca verda è vegnì nervus. El ha vesì ch'il ruver na perdeva betg tut sia feglia. Igl è vegnì primavaira e tranter la feglia veglia dal ruver ha entschet a chatschar nova feglia verda. Qua è quel da la cassacca verda vegnì uschè vilà, ravgià e grittentà ch'el ha cumenzà a stgarpar cun ses agens mauns la feglia giu dal ruver. Ils fastizs ves'ins anc oz vi da la feglia. Il ruver ha tegnì cun il pur. Grev da dir schebain l'unda verda è abla da generar ideas ed effectuar uschia che la natira tegna vivanant cun nus. La speranza mora para il pli davos. Pia sperain nus che noss patg cun quel da la cassacca verda per bainstanza senza cunfins prenda anc ina giada ina buna fin – per nus.

L'autura è pensiunada ed ha gugent da questas istorgias – era sch'ella sa che quellas n'en betg vairs, mabain sulettamain bain inventadas.